

पावलसे थेसलोनिकेला विश्वासीगदेदा भ्रिबा डाच्छारेमला चिठी

चु चिठीला बारेरी पाङ्तो:मा

भ्रिबा म्हि: येशूला मुल चेला पावलसे भ्रिबा मुबा। चु चिठी भ्रिबाला लागिरी पावलदा सिलासदेन तिमोथी भिबा म्हिसे हो लबा मुबा (१ थेसलोनिकी १:१)।

भ्रिबा ग्ला: कोरिन्थ शहररी भ्रिबा मुबा।

भ्रिबा साल: ओस्पन ईशवी संवत् ५० (विक्रम संवत् १०७) सालरी भ्रिबा मुबा। बाइबलला ल्हाना हड्बा विद्वानगदेसे पावलसे भ्रिबा चिठीगदे न्हडला चु जम्मान भन्दा डाच्छा भ्रिबा चिठी हिन्ना भिसी पाङ्मुला।

खाल्दा भ्रिबा: थेसलोनिके शहररी मुबा विश्वासीगदेदा भ्रिबा मुबा।

थेसलोनिके भिबा शहर रोम यहूल्सारी परब तबा माकेडोनिया भिबा अञ्चलला ग्लेखाड मुबा। पावल फिलिप्पी शहरग्याम चु शहररी निजी, ओच्छे थाबा पिन्बा समाचार थे:ना लसी मण्डली शुरु लजी (मुल चेला १७:१०)। तर थे शहररी यहूदीगदेसे तिगै धिन लिच्छा पावलदा बिरोध लजी। यहूदी धर्म सेम निबा अर्गु यहूलला म्हिगदेसे पावलसे थे:ना लबा थाबा पिन्बा समाचाररी विश्वास लबा म्हाङ्सी थे यहूदीगदेसे पावलदा बिरोध लजी। थे यहूदीगदेसे ल्हानान बिरोध लबासे लमा पावल थेसलोनिके शहरग्याम बेरिया भिबा शहररी निजी। लिच्छा पावल कोरिन्थ शहरग्याम धोखमा थेदेन छ्यामनोन प्रभुला गे लबा तिमोथीग्याम थेसलोनिके शहररी मुबा मण्डलीला बारेरी थे:जी।

चु डाच्छारेमला चिठी पावलसे थेसलोनिके शहररी मुबा विश्वास लबा म्हिगदेदा आँट पिन्बारीदेन तिगै ताम लोप्बाला लागिरी भिबा मुबा। ओच्छे थेनीगदेसे लबा विश्वासदेन मायाला बारेरी थे:सी पावलसे परमेश्वरदा धन्यवाद पिन्जी। पावलसे हाड थेनीगदेदेन छ्याम मुबा धुइरी हाड खाहङ् लसी चिबा मुबा थे ताम ढन्ना लबा मुला।

जमाहेन्से पावलसे ख्रीष्ट दो:सी फेप्खबाला बारेरी मण्डली न्हङरी थोन्बा तामगदेला जोहाब चुहङ् लसी पिन्बा मुला। तिग ख्रीष्ट दो:सी फेप्खबा भन्दा डाच्छान सिबा विश्वासीगदेसे ख्रीष्ट दो:सी फेप्खमा याङ्बा जुकजुकधोनाला जुनी याङ्ला? ख्रीष्ट दो:सी खाइमा फेप्खला? चुनोन धुइरी पावलसे थेनीगदेदा ख्रीष्ट दो:सी फेप्खला भिसी भ्रान्सी चिमा तिगै तामरी आकोल्ना कुटिसी ख्रीष्टला गे लबान निउ भिसी पाङ्बा मुला।

मुल तामगदे

- फ्याफुल्बा १:१
- पावलसे परमेश्वरदा धन्यवाद पिन्बादेन जयजयकार लबा १:२-१०
- थेसलोनिकेरी पावलसे लबा गे २:१-३:१३
- ख्रीष्टदा विश्वास लबागदेला बानीबेहोर ४:१-१२
- ख्रीष्ट दो:सी फेप्खबाला बारेरी घोना लबा ४:१३-५:११
- चिठीला थुमरी भिबा ताम ५:१२-२८

पावलसे थेसलोनिकेला विश्वासीगदेदा भिबा डाच्छारेमला चिठी

१ लास्सो थेसलोनिकेरी मुबा जम्मान विश्वासीगदेदा डा पावलदेन सिलास ओच्छे तिमोथीग्याम फ्याफुल्ला! एनीगदे जम्मासेन परमेश्वर आबादेन प्रभु येशू ख्रीष्टग्याम दयामायादेन शान्ति याङ्गै।*

थेसलोनिकेला म्हिगदेसे लबा विश्वास

२डन्से प्रार्थना लबा धुइरी सदन एनीगदेदा ढन्सी परमेश्वरदा धन्यवाद पिन्बा मुला। ३एनीगदेसे विश्वास लमाहेन्से गाते ज्यबा गे लबा मुला। हाड हाड न्हडरी गिकसेम गिकदा माया लसी गाते दुख लसी गे लबा मुला। ओच्छे यहाडला प्रभु येशू ख्रीष्ट फेप्खला भिसी एनीगदेसे लबा आश खाहड्बा कोड्बा मुला। चु जम्मान

ताम डन्से यहाडला परमेश्वर आबाला डाच्छा ढन्बा मुला।

४ज्योज्यो आले नाना आडा, परमेश्वरसे माया लसी एनीगदेदा धम्बा मुबा भिसी डन्दा था मुला।

५ओच्छे डन्से एनीगदेदा थेःना लबा परमेश्वरला यहुल्साला समाचार ताम जे आहिन। तर परमेश्वरला आत्मादेन शक्तिग्याम डन्सेनोन सेमहेन्से घोसी विश्वास लबा सत्य ताम मुबा। ओच्छे डनी एनीगदेदेन छ्याम चिबा धुइरी एनीगदेला लागिरी डनी खाहड्बा मुबा भिबा ताम एनीगदेदा थानोन मुला। ६एनीगदे प्रभु येशूदेन डनी हड्बान दोबा मुला। तिग्दा भिसम म्हिगदेसे जस्तोन दुख पिन्सैनोन एनीगदे परमेश्वरला आत्माग्याम ताङ्सी ताङ्सी परमेश्वरला बचनरी विश्वास लजी।* ७थेतबासेलमा

एनीगदे माकेडोनियादेन अखैया भिबा अञ्चलरी मुबा जम्मान विश्वासीगदेला गुडरी ज्यबा म्हि दोबा मुला। ८तिगदा भिसम एनीगदेग्याम परमेश्वरला बचन माकेडोनियादेन अखैया भिबा अञ्चलरी जे थे:ना लबा आहिन। तर एनीगदेसे परमेश्वरदा विश्वास लबा ताम जम्मान ग्लारी थे:बा मुला। थेतबासेलमा दाहेन्से डन्से पाङ्तो:बा अर्गु ताम तिगै आरे। ९तिगदा भिसम डनी एनीगदे मुबा ग्लारी खमा एनीगदेसे डन्दा खाहङ् लसी मान लबा मुला। ओच्छे छोन्बोदेन सत्य परमेश्वरला गे लबारी मूर्तिगदेदा तेन्बा ख्लासी एनीगदे परमेश्वरपट्टि दो:जी भिबा ताम म्हिगदेसेन पाङ्ला। १०थेहङ् लसीन एनीगदेसे परमेश्वरला भा येसू स्वर्गग्याम फेप्खला भिसी भ्रान्सी चिबा मुला। थेदा परमेश्वरसेन सिबाग्याम सोना लबा मुबा। ओच्छे थेसेन य्हाङदा पापला सजायग्याम थार्ना लला भिबा तामएनोन थेनीगदेसेन पाङ्ला।

पावलसे थेसलोनिके भिबा ग्लारी लबा गे

२ च्यागो आलेगदे, डनी एनीगदे मुबा ग्लारी खबा ल्हानान ज्यबा तजी भिबा एनीगदेदा थानोन मुला। २थेहङ् लसीन डाच्छा डन्से फिलिप्पी भिबा शहररी दुखदेन

म्हिला हेला नाजी भिबा तामएनोन एनीगदेदा था मुला। तर डन्दा बिरोध लबागदे ल्हानान मुसैनोन परमेश्वरला य्हुल्साला समाचार थे:ना लबारी परमेश्वरसे डन्दा आँट पिन्जी।* ३तिगदा भिसम डन्से लोप्बा तामगदे लुसीला तामएनोन आहिन्बा मुबा। ओच्छे नइबा तामदेन एनीगदेदा जाल लसी लोप्बा तामएनोन आहिन्बा मुबा। ४तर परमेश्वरसे डन्दा च्यासीन थार्बा पिन्बा समाचार थे:ना लबा जिम्मा डन्दा पिन्बा हिन्ना। थेतबासेलमा म्हिदा ताङ्ना लबारी आहिन तर य्हाङला सेमला ताम था याङ्बा परमेश्वरदा ताङ्ना लबारी म्हिगदेदा थे:ना लबा हिन्ना। ५एनीगदेदाएनोन चु ताम थानोन मुला डन्से एनीगदेदेन छ्याम तिगै चिप्ले तामएनोन आलनी ओच्छे तिगै याङ्ला भिसी लोभएनोन आलनी। चु ताम परमेश्वरदान था मुला।

६-७ डनी ख्रीष्टला मुल चेला तबासे लमा एनीगदेशोरी अधिकार लखम्सेला मुबा। तसैनोन डन्से एनीगदेदेन स्थान्दो खालै म्हिगदेसे डन्दा ज्यबा म्हि भिगै भिसी आम्हाइनी। तर ह्हाङला कोलागदेदा सयार लबा आमासे हङ् लसी डन्से एनीगदेदा माया लजी। ८च्यागो आलेगदे, एनीगदेला मायासे लमा डन्से एनीगदेदा परमेश्वरला य्हुल्साला समाचार जे आहिन, तर

डन्ना ज्यानएनोन एनीगदेला लागिरी
पिन्बारी डनी तयार मुबा। तिगदा भिसम
डन्से एनीगदेदा ल्हानान माया लमुबा।
६ज्योज्यो आले नाना आडागदेदा
थानोन मुला। डन्से परमेश्वरला
यहुल्साला समाचार थे:ना लबा धुइरी
खालैदा दुख आपिन्गे भिसी धिन
म्हनुनोन दुख लसी गे लबा मुबा।

१०विश्वासीगदेला गुडरी डन्से लबा
गे परमेश्वरदा सेम निबादेन चोखो
ओच्छे तिगै दोष आरेबा मुबा। चु ताम
एनीगदेदेन परमेश्वरदान था मुला।
११ओच्छे आबासे हाडला भा भामेदेन
छ्याम लबा हड्बान व्यवहार लसी
डन्से एनीगदेदा परमेश्वरदा सेम निबा
ग्यामरी भ्रबाला लागिरी आँट पिन्जी
भिबा ताम एनीगदेदा थानोन मुला।
१२थेतबासेलमा एनीगदेला चालचलन
परमेश्वरसे म्हन्बा अन्छार तगै। तिगदा
भिसम परमेश्वरसे एनीगदेदा थेला
यहुल्सा, शक्तिदेन य्हालरी ड्योइबा
मुला।

१३डन्से एनीगदेदा थे:ना लबा
बचनदा म्हिगदेला बचन आहिन तर
परमेश्वरलान बचन हिन्ना भिसी
विश्वास लजी। थेनोन परमेश्वरला
बचनसे एनीगदे न्हडरी गे लबान
मुला। थेतबासेलमा चुलान लागिरी
डन्से सदन परमेश्वरदा धन्यवाद
पिन्बा मुला। १४तिगदा भिसम
एनीगदेएनोन ख्रीष्ट येशूदा विश्वास

लबा यहूदिया अञ्चलरी मुबा
परमेश्वरला मण्डलीगदे हड्बान दोबा
मुला। ओच्छे यहूदिया अञ्चलरी मुबा
म्हिगदेसे हाडलान म्हि यहूदीगदेग्याम
दुख नाबा हड् लसी एनीगदेसेनोन
हाडलान म्हिगदेग्याम दुख नाबा
मुला।* १५चुनोन यहूदीगदेसे प्रभु येशू
ख्रीष्टदेन अगमवक्तागदेदा साइजी,
ओच्छे डन्दाएनोन दुख पिन्जी, ओच्छे
परमेश्वरदा बोमो खना लबादेन
जम्मान म्हिगदेदा बिरोध लबा मुला।*
१६ओच्छे अर्गु यहुलला म्हिगदेसे
थार्बा याङ्गै भिसी थे:ना लबा ताम
यहूदीगदेसे डन्दा थे:ना लआपुङ्नी।
थेहड् लसी यहूदीगदेसे पापथोरी भन
पाप लजी। थेतबासेलमा परमेश्वरसे
यहूदीगदेदा सजाय पिन्बा मुला।

पावलसे थेसलोनिकेरी मुबा म्हिगदेदा स्याप्बारी ल्हानान सेम लबा

१७य्हाड ज्योज्यो आले नाना आडा
न्हडरी तिगै धिनना लागिरी फेसै
य्हाडला सेम फेबा आरे। थेतबासेलमा
दो:सी एनीगदेदेन छ्याम हुप तबा सेम
डन्दा ल्हानान मुला। १८एनीगदे मुबा
ग्लारी डनी खबारी म्हाइमुबा। ओच्छे
डा पावल एनीगदे मुबा ग्लारी ल्हानान
रेम खबारी म्हाइमुबा। तर डनी खबारी
म्हाइमा सदन शैतानसे ग्याम काजी।
१९य्हाडला प्रभु येशू ख्रीष्ट फेप्खबा

धुइरी थेला डाच्छा डन्से लबा
आशदेन ताड्तो:बा ताम एनीगदेन
आहिन? हिन्ना। ^{२०}डन्से याड्तो:बा
मानदेन डनी ताड्तो:बा ताम भिबान
एनीगदे हिन्ना।

तिमोथीदा थेसलोनिकेरी पुइबा

३ थेतबासेलमा एनीगदेग्याम
फेसी चिबारी डन्ना सेमसे
आड्यान्नी। ओच्छे डनी चा एथेन्स
भिबा ग्लारीन चिबारी ज्यबा छोर्सी
थेरीन चिजी। * ^२तर तिमोथीदा चा
एनीगदे मुबा ग्लारी पुइखबा मुला।
तिग्दा भिसम थेसेन एनीगदेदा
विश्वासरी कोङ्ना लबारी आँट
पिन्ना। य्हाडला आले तिमोथी चा
ख्रीष्टला समाचार थे:ना लबा डन्देन
छ्यामनोन परमेश्वरला गे लबा म्हि
हिन्ना। ^३थे धुइला दुखसे लमा एनीगदे
खालैनोन याड्योड थातगै भिसी डन्से
म्हन्बा मुबा। य्हाड सोतेधोना दुख मी
खनोन खला भिबा ताम एनीगदेसेनोन
घोसी जिन्बा मुला। ^४तिग्दा भिसम
डनी एनीगदेदेन छ्याम मुबा धुइरीन
य्हाडसे दुख नातो:ला भिसी डन्से
डाच्छान पाड्बा मुबा। डन्से पाड्बा
हड् तनोन तजी, थे एनीगदेदाएनोन
थानोन मुला। ^५थेतबासेलमा डाइ
नाआखम्ना एनीगदेला विश्वास
खाहड्बा चीम भिसी घोबाला लागिरी
डाइ एनीगदे मुबा ग्लारी तिमोथीदा

पुइखबा मुला। तिग्दा भिसम एनीगदेदा
खालै म्हिसे लोभ उन्सी फसब लसी
डन्से लबा गेगदे गे आखेल्ला तना
लजी वा भिसी डा लोड्बा मुबा।
^६तर दान्दे तिमोथी एनीगदे मुबाग्याम
डनी मुबा ग्लारी खसी एनीगदेसे
परमेश्वरदा लबा विश्वासदेन हाड
हाड न्हडरी माया लसी ढिक्सी
चिमुला भिबा ज्यबा समाचार डन्दा
पाड्जी। ओच्छे डन्से एनीगदेदेन
छ्याम हुप तबारी म्हाइबा हड्
एनीगदेसेएनोन डन्दा ल्हानान ढन्सी
सदन हुप तबारी म्हाइबा मुला भिबा
तामएनोन पाड्जी। * ^७थेतबासेलमा
ज्योज्यो आले नाना आडा, डन्दा दुख
तसी सुर्दा तबा धुइरीनोन एनीगदेसे
लबा विश्वासला बारेरी थे:सी डनी
ताड्बा मुला। ^८तिग्दा भिसम एनीगदे
प्रभुरी कोङ्सी चिबा मुला भिबा थे:सी
डनी ल्हानान ताड्बा मुला

^९एनीगदेसे लमा डनी परमेश्वरला
डाच्छा ल्हानान ताड्म्याड्बा मुला।
चुला लागिरी डन्से परमेश्वरदा जतिन
धन्यवाद पिन्सै आछ्यो। ^{१०}एनीगदेला
विश्वास अझ कोङ्ना लबा सेम लसी
दो:सी एनीगदेदेन छ्याम हुप तम्याड्गै
भिसी डन्से धिन म्हुननोन भन्सी
प्रार्थना लबा मुला।

^{११}दाहेन्से य्हाडला परमेश्वर
आबादेन प्रभु येशूसेन डनी एनीगदे
मुबा ग्लारी खबाला लागिरी ग्याम


स्होसी पिन्गै।^{१२}डन्से एनीगदेदा माया लबा हङ् लसी एनीगदेसे हाङ हाङ न्हङरी लबा मायादेन जम्मान म्हिगदेदा लबा मायादा प्रभुसेन ल्हानान लहेना लगै।^{१३}य्हाङला प्रभु येशू हाङला म्हिगदेदेन छ्याम दोःसी फेप्खबा धुङरी परमेश्वरसेन एनीगदेला सेमरी भङ पिन्सी थेला डाच्छापट्टि तिगै दोष आरेबादेन चोखो म्हि स्होगै।

परमेश्वरदा सेम निबा गे लउ

४ दाहेन्से एनीगदे प्रभु येशूला म्हि तबासे लमा परमेश्वरदा ताङ्ना लबारी खाहङ् लसी भ्रतोःला भिबा ताम डन्से लोप्सी जिन्बा मुला। ओच्छे एनीगदेसे डन्से लोप्बा हङ्नोन लबान मुला। थेतबासेलमा ज्योज्यो आले नाना आडागदे, अभ एनीगदेसे थेहङ्बा ज्यबा गे लबान निउ भिबा डन्ना बिन्ती मुला।^२तिगदा भिसम डन्से प्रभु येशूग्याम एनीगदेदा तिग तिग ताम कुल्बा मुबा थे ताम एनीगदेदा थानोन मुला।^३एनीगदे चोखो म्हि दोगै भिसी परमेश्वरसे म्हन्बा मुला। थेतबासेलमा एनीगदेसे स्थहान्दोदेन छ्याम ब्रेल्सी भ्रबा तामरी संगतनोन थालउ।^४एनीगदेसे हाङसे हाङलान लहुइदा तहरी थान्बारी लोप्जै भिसी परमेश्वरसे म्हन्बा मुला। ओच्छे स्थहान्दो म्हिगदेग्याम मान लबाला लागिरी एनीगदेसे हाङला लहुइदा चोखो थान्गो।^५ओच्छे एनीगदेसे परमेश्वरदा डोआसेबा

म्हिगदेसे हङ् लसी खाल्दमनदेन छ्याम ब्रेल्बा सेम थालउ।^६चु तामरी आज्यबा गे लसी विश्वासी ज्योज्यो आले नाना आडागदे न्हङरी खालैसे खालैदान न्होङ्ना थालगै। च्यागो, चुहङ्बा गे लजी भिसम प्रभुसेन सजाय पिन्ना भिसी डन्से एनीगदेदा डाच्छान घोना लसी जिन्बा मुला।^७तिगदा भिसम परमेश्वरसे य्हाङदा चुहङ्बा नइबा गे लबारी आहिन, तर तिगै दोष आरेबा चोखो म्हि दोसी भ्रबाला लागिरी ड्योइबा हिन्ना।^८थेतबासेलमा जुन म्हिसे चु तामदा वास्ता आल थेसे म्हिदा आहिन, तर एनीगदेदा हाङलान आत्मा पिन्बा परमेश्वरदा वास्ता आलबा हिन्ना।^९विश्वास लबा ज्योज्यो आले नाना आडादा खाहङ् लसी माया लतोःला भिबा ताम डन्से एनीगदेदा पाङ्आतोः। तिगदा भिसम चु ताम एनीगदेदा परमेश्वरसेन लोप्सी जिन्बा मुला।^{१०}ओच्छे थेनोन अन्छार एनीगदेसे माकेडोनिया भिबा अञ्चलरी मुबा जम्मान विश्वासीगदेदा ल्हानान माया लबा मुला। थेतबासेलमा ज्योज्यो आले नाना आडागदे, थेहङ् लसीन एनीगदे हाङ हाङ न्हङरी अभ माया लसी चिउ भिबा डन्ना अर्ती मुला।

^{११}डाच्छा डन्से एनीगदेदा लोप्बा तामरी दुक्क तसी हाङ हाङला गे सेम लसी लबान ढिक्सी चिउ।^{१२}चुहङ् लसम एनीगदेदा म्हिगदेसेनोन मान



बिगुल (४:१६)

लला। ओच्छे एनीगदेदा खाँचो तबा धुइरी स्थान्दो म्हिला भर लआतोः।

प्रभु दोःसी फेप्खबा

१३ ज्योज्यो आले नाना आडागदे, एनीगदेसे सिबा विश्वासीगदेला बारेरी था याङ्गै भिबा डन्से म्हन्बा मुला। थेतबासेलमा आशनोन आरेबा म्हिगदे हङ् लसी एनीगदे सुर्दा थालउ। १४ तिग्दा भिसम येशू सिबाग्याम दोःसी सोजी भिसी य्हाडसे विश्वास लबा मुला। थेहङ् लसीन सिबा विश्वासीगदेदा परमेश्वरसेन येशूग्याम दोःसी सोना लसी थेदेन छयामनोन भला भिसी एनीगदे य्हाडसे विश्वास लबा मुला। १५ प्रभुसे सुङ्बा हङ् डन्से पाङ्बा ताम ड्यान्गो, प्रभु दोःसी फेप्खबा धुइरी य्हाड सोबागदे तिगै लसीन सिबा विश्वासीगदे भन्दा डाच्छा तआखम।* १६ तिग्दा भिसम प्रभु हाङनोन घेन काइरी कुल्बान

मुल स्वर्गदूतला काइदेन परमेश्वरला बिगुलला काइरी स्वर्गग्याम फेप्खला। थेनोन धुइरी खीष्टदा विश्वास लसी सिबागदे चा डाच्छान सोला। १७ जमाहेन्से य्हाड सोबागदे मुरी हुप तबारी थेनीगदेदेन छयामनोन खसुरी थीसी भोर्ला। ओच्छे य्हाड सदनना लागिरी प्रभुदेन छयामनोन चिला। १८ थेतबासेलमा चु तामग्याम गिकसे स्थान्दोदा आँट पिन्गो।

५ तर ज्योज्यो आले नाना आडागदे, चु ताम खाइमा तला भिसी एनीगदेला लागिरी तिगै भितोःबा आरे। २ तिग्दा भिसम प्रभु फेप्खबा धुइरी म्हुनङ य्हो खबा हङ् लसी फेप्खला भिबा ताम एनीगदेदा थानोन मुला।* ३ थे धुइरी म्हिगदेसे “य्हाडदा शान्ति मुला तिगै लोङ्बा डोबा आरे भिसी भिला।” थेनोन धुइरी भिडम्हेमेदा कोला न्हबा धुइरी बेथा याङ्बा हङ् थेनीगदे तिक्खुरीन नाश तला। जमाहेन्से थेनीगदे थेहङ्बा आपत विपतग्याम तिगै लसीन स्योर आम्याङ्। ४ तर ज्योज्यो आले नाना आडागदे, एनीगदे धोपधोपरी आरे। थेतबासेलमा एनीगदेला लागिरी प्रभु फेप्खबा धुइरी य्हो खबा हङ्बा आत। ५ तिग्दा भिसम एनीगदे जम्मान धोपधोपदेन म्हुनङ भ्रबा म्हिला सन्तान आहिन, तर य्हालदेन धिनीरी भ्रबा म्हिला सन्तान हिन्ना।

६थेतबासेलमा य्हाड स्य्हान्दो म्हिगदे हङ् लसी म्हेर्बारी आत। तर होशियार तसी छोर्सी चितोःला। ७तिग्दा भिसम म्हेर्बागदे म्हुनडनोन म्हेर्ला ओच्छे थुङ्बागदेएनोन म्हुनडनोन ड्य्होइसी भ्रमुला। ८तर य्हाड चा धिनीरी भ्रबा म्हिला सन्तान तबासे लमा होशियार तसी भ्रतोःला। ओच्छे सेनासे ह्वाङ्दा जोगब लबारी कुरी पाता थान्बा हङ् लसी य्हाडसेनोन ह्वाङ्दा जोगब लबाला लागिरी य्हाङ्दला विश्वासदेन मायादा थोसी भ्रतोःला। थेहङ् लसीन य्हाङ्दसे पूरा थार्बा याङ्दला भिसी लबा आशदा सेनागदेसे सदन टोप कूबा हङ् लसी सदन कूतोःला।* ९तिग्दा भिसम परमेश्वरसे य्हाङ्ददा सजाय पिन्बारी आहिन। तर प्रभु येशू ख्रीष्टग्याम थार्बा पिन्बारी डाच्छान धम्बा हिन्ना। १०प्रभु फेप्खबा धुइरी य्हाङ्द सिसे सोसै प्रभुदेन छ्यामनोन सोगै भिसी प्रभु येशू य्हाङ्दला लागिरी सिजी। ११थेतबासेलमा एनीगदेसे दान्दे लबा हङ्दोन गिकसे गिकदा आँट पिन्सी भङ्ना लबा गे लउ।

चिठीला थुमरी भिबा ताम

१२ज्योज्यो आले नाना आडागदे, एनीगदेला गुडरी दुख लसी गे लबागदेदा मान लउ भिबा डन्ना बिन्ती मुला। तिग्दा भिसम थेनीगदेसे प्रभुला लागिरी खाहङ् लसी भ्रतोःला भिबा

ताम एनीगदेदा लोप्ला। १३थेनीगदेसे ज्यबा गे लबासे लमा थेनीगदेदा मायादेन मान लउ। ओच्छे ह्वाङ्द ह्वाङ्द न्हङ्दरी ढिकसी चिउ।

१४ज्योज्यो आले नाना आडागदे, ब्लेगुगदेदा अर्ती पिन्बादेन हरेस चबागदेदा आँट पिन्गो। ओच्छे आखम्बागदेदा हो लबादेन जम्मालान ओन्छाङ्दरी ज्यबा गे लसी उन्गो भिबा डन्ना बिन्ती मुला। १५ओच्छे खालैसे एनीगदेदा आज्यबा लजी भिदेमा एनीगदेसे थेदा आज्यबा थालउ। बरु गिकसे गिकदा ओच्छे जम्मान म्हिगदेदा सदन ज्यबा व्यवहार लबारी म्हाङ्गो। १६सदन ताङ्सी चिउ। १७ओच्छे सदन प्रार्थना लउ। १८दुख सुख जस्तोन तसै धन्यवाद पिन्गो। तिग्दा भिसम ख्रीष्ट येशूदेन छ्याम गिक तबा एनीगदेसे चुहङ्बा लगै भिसी परमेश्वरसे म्हन्बा मुला। १९ओच्छे परमेश्वरला आत्मासे लबा गेदा रोकब थालउ। २०खालैसे परमेश्वरग्याम पाङ्बा तामदा हेला थालउ। २१ओच्छे जम्मान ताम सेसी घोसी जुन ताम ज्यबा मुला थेनोन तामरी भङ्बा तसी चिउ। २२ओच्छे जम्मान आज्यबा तामगदेग्याम थारेङ् तसी चिउ। २३शान्ति पिन्बा परमेश्वरसेन एनीगदेदा पूरा चोखो तना लगै, ओच्छे य्हाङ्दला प्रभु येशू ख्रीष्ट दोःसी फेप्खबा धुइरी एनीगदेला आत्मादेन

सेम ओच्छे ल्हुइरी तिगै दोष आरेबा तगै। ^{२४}एनीगदेदा ड्योइबा परमेश्वर विश्वास लखम्बा परमेश्वर हिन्ना। थेसेन एनीगदेदा चु जम्मान ताम पूरा लसी पिन्ना। ^{२५}थेतबासेलमा ज्योज्यो आले नाना आडागदे, एनीगदेसे डन्ना लागिरीनोन प्रार्थना लसी पिन्गो। ^{२६}जम्मान ज्योज्यो आले नाना

आडागदे हाड हाड न्हडरी गिकसेम गिकदा सेमहेन्सेन माया लसी फ्याफुल्गो। ^{२७}प्रभुला अधिकारग्याम डाइ पाइबा ताम ड्यान्गो। एनीगदेसे चु चिठी जम्मान ज्योज्यो आले नाना आडागदेदा पढब लसी थेःना लउ। ^{२८}यहाडला प्रभु येशू ख्रीष्टला दयामाया एनीगदेथोरी तगै।